

Angallannermi politikki – Sermersooq ”Angallaffiulluartoq.”

Aallaqqaasiut

Nuummut angallannermi politikki Kommuneqarfik Sermersuup siunissami angallannermut pilersaarusiornissaanut atugassatut siunertaavoq. Immikkoortut pingartitat pingasut, tassa aqqusinernik angallaffeqarluarnissaq, isumannaatsuunissaq illoqarfimmilu illoqannginnersat, ilaatigut angallannerup attaveqaasersornerata suliarineranut Sermersuup siunissami suliarinissaanut ataqatigiissaarisitsissaaq. Innuttaasut amerliartorneranni illoqarfinnullu nutserneruleraneranni kommunimi ullumikkut siunissamilu pisariaqartitat naapertuuttut angallannermut aqqiissutit pitsaasut atuutsilernissaat aalajangiisuulluinnartuussapput.

Inoqarfik pitsaasuussappat aqqusernit angallaffiulluarsinnaasut piginissaat aalajangiisuussaaq. Angallannerup ajornaquteqanngitsumik pitsaasumillu pinissaa qulakkeerniarlugu angallattut unittoortarnerat annikillisinnaavarput, angallannermi piffissat atorneqartut pitsanngorsarsinnaavagut innuttaasunullu tamanut angallavigiuminarsaalluta. Tamanna ulluinnarni unittoortarnerut oqilisaataaginnarnaviangilaq aningaasaqarnikkulli siuariartorneq piujuartitsisumillu ineriartornermut siuarsaataassaaq.

Angallannermi politikki isumannaallisaaneq pingartinneqarnerpaajuvoq. Iliuusissanik atuutilersitsinikkut ilaatigut ajutoorutaasinnaasunik annikillisaanikkut aamma pisuinnaat biilertullu pillugit toqqissisimanartuutitsinikkut angallanneq isumannaatsoq toqqissisimanartorlu pilersissinnaavarput. Matumani ilaatinneqarput aqqusinerni allagartat, qullilersuineq, pisuinnaat ikaarfissaat, aqqusineqqat aamma ukiukkut aputaajaasaneq kiisalu angallannermik ilinniartitsinerup, sukkassutsit killigititaasa angallannermullu malittarisassat malinneqarnissaannik eqqumaffiginninnerit.

Inoqarfimmik uummaarissumik pilerinartumillu pilersitsiniarutta illoqarfimmi inissaqarluarnissaa aalajangiisuussaaq. Aqqusinernut biilerfiunngitsunut, sukisaarsarfinnut kikkunnillu tamanit ornigarneqartartunut naapittarfiusunullu aqquteqaruminarsaalluni angallannermut pilersaarusiornermi ukkataqarnikkut inunnut toqqissisimaffiusunik ornigarneqarumasunillu pilersitsisinnaavugut. Tamanna innuttaasut inuunerannut pitsanngorsaataassaaq avataaniillumi tikeraartutsinnut misigisaqarfiulluassalluni.

Nuummi sumiiffiit tikikkuminarsarniarlugit, isumannaallisarlarniarlugit illoqarfimmilu illoqannginnersat pitsanngorsarniarlugit immikkoortut pingaarutillit pingasut Kommuneqarfik Sermersuumiit pingartinneqarput. Oqartussaaffeqarfiit, soqutigisaqatigiit innuttaasullu akornanni suleqatigiilersitsinikkut ullumikkut siunissamilu pisariaqartitanik naammassinnittumik angallannermut ilusissamik piujuartumik nutaaliaasumillu pilersitsisinnaavugut.

Sumiiffinnut tikikkuminarsaanermut suleriaaserput

Kommunimi innuttaasumut ataatsimut inuinnaat biilii amerliartorput, pingaartumik Nuummi, taamaammat angallannermi aqqusinerni biilerpassuusarput. Sumiiffinnut tikikkuminarsaanermi angallassissutinut tamanut atuutissaaq, taamaattorli aamma mingutsitsinngitsumik angallannerit, soorlu pisuinnaat, cykelertut bussillu eqqarsaatigalugit ineriartortitsineri.

Najugaqarfigisatsinni ornitassat ungasinnginnamik pisuinnarnut naleqqussagaapput aqputigineqartartulli manissuinnaanatililu silarlukkajussinnaasarmat ajornartorsiuteqartarpoq. Sumiiffinni ajornartorsiutit iluarsivigineqassappata aqqusernit suliarineqarnissaat ingerlaarfiusinnaasullu aalajangiisuullunnarput.

Pisuinnartarnissaq pitsaasumik pilersaarusionerani inuiaqatigiit peqqinnerulernissaannut iluaqutaassaaq, angallannermi piffissaq angallattunut tamanut sivikinnerulissaaq sumiiffinnilu silaannaap mingutsinneqarnera annikillisinneqarluni.

Sumiiffiit tikikkuminarsarumallugit suleriutsit pingaarnert marluupput. Sanaartornerup tungaatigut imaluunniit pissusilersuutit allanngortinnerisigut suliniuteqarneq. Pissusilersuutit allanngortinnerat eqqarsaatigalugu aqqusernit annertuumik pilersaarusionerqartarnerisut ilisimalluakkatsitut aningaasartuutit annertuut atunngikkaluarlugit angallannerup ingerlanneranut annertuumik sunniuteqarsinnaapput. Sumiiffiit tikikkuminarsarnissaannut sunniuteqarsinnaasut tamaasa atorlugit Kommuneqarfik Sermersuumiit atuutsinneqassaaq sanaartornerli pitinnagu pissusilersortarnerit ukkatareqqaarneqassallutik.

Isumannaallisaanermut suleriaaserput

Pisuinnaat illersorneqannginnertik pissutigalugu angallattuni navianarnerpaamik inissisimapput. Isumannaatsumik atugaqartinneqarnissaat pingaaruteqarpoq. Tamanna iluarsineqarsinnaavoq pisuinnaat biilertullu aqquserngisa immikkoortinnerisigut.

Tamanna aqqusineeqqanik ikaartarfinnillu immikkoortitsinikkut anguneqarsinnaavoq ilaatigut pisuinnaat biilertartullu immikkoortinneqarlutik. Aqputit immikkoortinnerisigut assigiinngitsutigut angallattut akornanni aportoqarsinnaanera ajutoortoqarsinnaaneralu amerlasuutigut inuit ajoqusernerannik kinguneqartartoq annikillisarneqarsinnaavoq. Tamatuma peqataanik immikkoortinneqarnerisigut tikikkuminassuseqarneq atuutsinneqassaaq.

Aqqusermi atortut allagartallu pisuinnaat biilertullu akornanni aqutaasa immikkoornerannik erseqqissumik takussutissiisut atuutsinneqarnissaat pisariaqartinneqarportaaq. Tamanna angallattunit tamanit maluginiarnerunissaanut eqqummaariffiginerunissaanullu iluaqutaassaaq taamaalillunilu angallannermi isumannaatsuunissamat pitsanngorsaaqataaffiussalluni.

Immikkoortinneqarsinnaanngitsut qullersuarnik qaammaqqusersorluarneqassapput. Inuit ajoqusertartut amerlipiloorput ilaatigut angallattut pitsaanngitsunik qaammaqqusersuineq pissutaatinneqartarluni.

Aqqusermi qaammaqquteqarluarneq angallannermi isumannaallisaanermik qulakkeerinnittuusarpoq, pingaartumik pisuinnaat biilertartullu angallaffiusuni ataatsimi akuleriitinneqartillugit. Naammattunik qaammaqquteqartarnissaq qulakkeerniarlugu, qaammaqqutit akulikitsuutinissaat aamma sila eqqarsaatigalugu angallattunut tamanut toqqissisimanartoq isumannaatsorlu pilersinneqarsinnaavoq.

Pisuinnarnut biilertartunullu angallannermi isumannaallisaaneq pillugu ilinniartitaanerup paasititsiniaanerullu siuarsaaviginissaat pingaaruteqarpoq. Tassa imaappoq angallannermik ilinniartitsineq meeraanermiilli ilinniarneqartariaqarpoq inuunerullu sinnerani atugassaalluni. Pisariaqartinneqartut

ajornartorsiutaasullu paasilluarumallugit angallattuni ataqpeqatigiinneq allanillu eqqarsaatiginnilluarnermik periuseqarneq pilersinneqarsinnaavoq.

Illoqarfimmi illoqannginnersanut pitsaasunut suleriaaserput

Illoqarfimmik pilersarusiornermi piujuartitsineq atuuffinnillu pilersitsinissamut illoqarfimmi illoqannginnersat pitsaasut aalajangiisuusarput. Illoqarfimmi illoqannginnersat sammisassaqaqarnitsinnut, aalanitsinnut, kulturitsinnut nalliuttorsiornitsinnullu ilanngullugit atorneqarsinnaassapput. Tassani innuttaasut imminnut naapittarput ataatsimoonernillu nutaanik pilersitsiviusinnaalluni.

Nuup illoqarfittut alliarturnera ilutigalugu illoqarfimmi illoqannginnersat misigisassarsiorfiusinnaasut sammisaqarfiusinnaasullu ukkatarineqarput. Taamaattumik illoqarfitsinni illoqannginnersat ukiup allanngoranneranut; qaqortoq, qasersoq, qorsuk taakkualu nassatarisaanik sammisassaqaqartitsinernut naleqqussagaassapput. Silami allanngorartumi taamaattumi illut akornanni inuaqerpalaartitsisinnaanermut inissaqaqartitsineq naammaneq ajorpoq. Illoqarfimmi illoqannginnersat aaqqissuussanut atuuffissaanullu soorlu pinnguartarfiit, sukisaarsaarfiit aputinilluunniit katersuuffinnut naleqqussarnissaat pisariaqarsinnaavoq. Allatut oqaatigalugu illoqarfimmi illoqannginnersat ukiup qanoq ilinerani sammisassanut atuuffissaanullu atorsinnaanissaanik qulakkeerinninnissarput pingaaruteqarpoq.

Illoqannginnersat pitsaasut inissaqarluartarnissaat pisariaqarpoq. Inissat ilaatigut biilit uninngasarfiinut allatigulluunniit atorneqarneri pissutaallutik sammisaqaqartitsivittut, pinnguartarfeqaqarnissamut imaluunniit silami uninngaarfiusinnaasutut aaqqissuunneqaqarnissaat ajornakusoorput. Taamaattumik illoqarfiup illoqannginnersai asfalternikuinnarmiit annertunerusariaqarput - Ullup imaluunniit ukiup ingerlanerani allanngorartumik atorneqarsinnaasuussapput, amerlanerusunut iluaqutaasinnaaniassammata.

Taamaattumik qanoq pitsaanerpaamik immikkoortut assigiinngitsunut atorneqarsinnaasunngornissaanut ullormut tiimialuinnarni biilinu unittarfiinnaanngikkaluartumik ujartuissaagut. Tamanna soorunami silaannaap nunallu unammillernartuinik eqqarsaatiginnilluni kiisalu attuumassuteqaqartunik peqataatitsilluni pissaaq.